



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma : Tir Yimiyim

tiryimiyim@aolima

tir yimiyim

TAPAK 10



Myanmar nung Aung San Suu Kyi anema ken o tasen benoker

Asian Games nung gold medal takok angusang Dingko Singh süogo

VOL. XVIII NO. 237 (ADOK 237) DIMAPUR

ROGONÜ (FRIDAY)

AAMI (JUNE) 11, 2021

₹ 5.00

Nagaland COVID-19: Tasen puteter dang taneptsü angur timba

Kohima, Aami/June 10 (TYO): Nagaland nung anogo pongububa atonga nisung tasen dak COVID-19 tashidak putetba dang iba tashidak nungi taneptsü angur timba liasü. Brehostibarnü state nung nisung 117 coronavirus nungi taneptsü angur aser nisung 113 dak iba tashidak puteta caseload 23,350 alitsü.

"Tanü nisung 113 dak COVID-19 positive liasü - Mokochung nung 47, Dimapur nung 22, Tuensang nung 17, Kohima nung 13, Phek nung pongu, Mon nung ana, Wokha nung ana, Zunheboto nung ana aser Kiphire nung ka," ta State Nodal Officer for Integrated Disease Surveillance Project, Dr Nyanthung Kikon ajanga anogoshi sangdongba COVID-19 bulletin nung ashi.

inoker lir aser nisung 11 ventilator nung lir, aser nisung 3,591 temang nung iba tashidak agi timtem agütsüba mali, ta pai ashi.

Brehostibarnü Dimapur aser Phek nung nisung ana-na, Kohima aser Mokochung nung ka-ka asüba ajanga state nung iba tashidak agi meneper asir nisung 441 kumogo aser item ronngung nisung 14 bo danga tashidak agi asüba lir, ta pai ashi.

COVID-19 tashidak agi meneper ajak agi nisung 654 tashi danga state temi ogo, ta ashi.

Nagaland nung tang tashinung COVID-19 tashidak alitsü südi ta temolung melemteti sample 2,03,922 tendangogo. Item ronung RT-PCR ajanga 92,940, TrueNat ajanga 57,866 aser Rapid Antigent Test ajanga 53,116 tendanga liasü, ta Dr Kikon-i ashi.

Nagaland nung Bodhbarnü tashinung nisung 2,63,974 nem COVID-19 mozü doses 3,28,397 agütsüogo, ta State Immunization Officer Dr Ritu Thurr-i ashi.

State nung COVID-19 mozü agütsür alirtem ronngung frontline worker 59,173, healthcare nung inyaker 15,955, arishi küm 45 tema alir nisung 1,26,518 aser arishi küm 18 nungi 44 tsüngta alir nisung 62,647 alitsü, ta pai ashi.

Nisung 54,424 nem mozü dose tanabuba agüja parnokbo vaccination course ajak temogo. Parnok ronngung frontline worker 28,095, healthcare nung inyaker 10,222 aser arishi küm 45 nung tema nisung 16,107 alitsü, ta Dr Thurr-isa ashi.

Paisa, kasa anogo Dimapur nungi nisung 51, Tuensang nungi nisung 30, Kohima nungi nisung 12, Phek nungi nisung 7, Kiphire nungi nisung trok, Wokha nungi nisung pongu, Zunheboto nungi nisung pongu aser Mon nungi nisung ka taneptsü ngua tang state nung iba tashidak nungi taneptsü angur ajak agi 18,378 alitsü, ta ashi.

State nung taneptsü anguba ya Bodhbarnü shilem 78.59 liasü, aser Brehostibarnü shilem 78.70 kumogo, ta pai ashi.

Tang State nung COVID-19 active cases 3,877 alitsü, ta ashi.

Tang aliba active cases nungi nisung 166 dak iba tashidak agi timtem sümia agütsür, nisung 54 dak timtem tera lir aser oxygen nung lir, nisung 34 kanga sashia timtemer aser oxygen nung lir, nisung 19 kanga mejungi shiranga ICU nung ventilator

CM Neiphiu Rio-i Nagaland COVID Information App amenoktsü



Nagaland Chief Minister, Neiphiu Rio-i Nagaland COVID Information App tenzütsüba noksa nung angur. (Kohima, June 10, 2021)

Kohima, Aami/June 10 (TYO): Nagaland Chief Minister, Neiphiu Rio-i, June 10 nü State COVID-19 War Room, Nagaland Civil Secretariat, Kohima nung Nagaland COVID Information App amenoktsüogo.

CM Rio-i Twitter ajanga iba osang lemsatepogo. "Nagaland COVID Information App amenoktsüogo; iba app ya Department of Information Technology & Communication, GoN-i yanglua liasü. Iba user-friendly app ajanga osang mela

mela agizüktetsü aser Nagaland nung aliba nüburtem nem teyari agütsütsü imlar," ta CM Rio-i tweet asi.

Iba App nükjidongji, sabang ka ajanga dang nüburtem nem COVID-19 dak sendakba osang ajak agütsütsü asoshi lir, kong jondak mapang nüburtem nem teyari kara kara agütsütsü atema state kübok jenjang ajak nung COVID-19 achaayangertem indang contact osang densema lir.

Nagaland COVID information mobile app ajanga, COVID-19

case jenjang, ICU yipden kwi tazüng lir, Oxygen aser Ventilator kwi lir, sorkari agütsüba tetuyuba aser osang balala, jondak mapang tongteprateptsü atema contact, COVID-19 tashidak tendangba tesemtem indang osang, COVID-19 vaccine agiba tesem osang densema lir aser Hospital help desk den mobile app nungi indang indanga jembitettsü atema-a mongka agütsür. Iba App yagi tamshirtem indang data kecha mebendener.

Nagaland COVID information mobile app ya Android aser iPhone amshirtemi Google play Store aser App Store nungi download süa amshitettsü.

Nagaland Health Minister S Pangnyu Phom, Advisor IT, Science & Technology, NRE, GoN, Mmhonlumo Kikon, Chief Secretary, J Alam IAS, Principal Secretary to GoN, Amardeep S Bhatia, IAS aser tanga tongtibang ketdangsurtem aika iba mobile app amenokba sentong nung dena liasü.

PM Modi-i linük asoshi mapa tajung jenti inyaker: Minister Imna Along

Kohima, Aami/June 10 (TYO): Ato Kilonser Narendra Modi-i makamaiter nem jang agütsütsü aser nübur ajak nem COVID-19 mozü angati agütsütsü nangzükbata atema pelaba lemsatepba mapang, iba ya ajanga state nung COVID-19 tashidak wara den raraba nung nüburtem kanga ajangzüksü, ta Nagaland BJP ajanga ashi.

Prime Minister's Garib Kalyan Yojana ya taküm November ita tashi atsülangtsü aser June 21 nungi tenzüka linük tesem ajanga nung ajak nem COVID-19 mozü angati agütsütsü, ta Ato Kilonser Modi-i

June 7, 2021 nü sangdonga liasü.

Central sorkar indang angati jang agütsüba scheme ya June ita atemtsü liasü, saka November ita, Deepawali tashi atsülangtsü, aser ibai Modi sorkari alima nung nütsüng yongsük timtuba aliba linük jenjang tanabuba nung aliba asoshi otsütsü sangdongba lir, ta Nagaland BJP tir aser Minister, Higher Education and Tribal Affairs, Temjen Imna Along ajanga Brehostibarnü Kohima nung osangbener senden ka nung ashi.

"Ato Kilonser Modi ajanga iba ama osang tulu sangdongba

Nagaland BJP-i pelashishia agizüker aser state nung aliba nüburtem tenüng nung Modi sorkar dang pelar," ta pai ashi.

Tang COVID-19 tashidak wara agi tesem ajanga sünger aliba mapang iba scheme ya ajanga Nagaland nunga makamaiter ajangzüksü imlar, ta pai ashi.

Yimdak-yimtsüng nung alirtem aser makamaiter tem tang tashidak wara agi aayang moteti timtema aliba mapang iba ama sangdong yagi otsü yanglutsü, ta pai ashi.

(Maneni page 2 nung...)

Party telungzük nung mepetmesü atema Nagaland BJP tiri ola adok

Kohima, Aami/June 10 (TYO): 2020 küm June ita sülen district unit tir teinyakdak alirtem democratic yimya nung mesüi mapa nungi anentsü, ta tai tongloktsüba sülen Party telungzük nung mepentemsü adokba dak sendakba nung tanü Nagaland BJP tir, Temjen Imna Along-i ola adoka liasü.

District tenet indang BJP unit tirtemi Kohima nung May 5, 2021 nü tetsüsa osangbener den jembiba mapang, Wokha aser Kiphire nungi pai ashiba angartem kisüng yutsür district ajak indang tirtem Imna Along-i mapa nungi anentsü, ta tai tongloktsüba nenshia ashiba mapang pa State BJP tir menden nungi agientsü takhangba agüja liasü.

Parnok ya Party indang

constitution nung aliba ama district unit nung tir shim, ta nenshia ashi aser State tiri parnok kodang mapa nungi anentsütsüar memetetba yong district ketdangsurtemi mapa timi meinyakteter, ta melalai aliba lenirtemi shia liasü.

"Onok tetsüba aser terata nung Party ajungtsü atema temolung ajak agi mapa meinyakteter," ta parnoki May 5 nü shia liasü.

Ajisüaka tanü State BJP tir Along-i, "Asen party ya high-command party ka lir, aser asen high-command ajanga ni State BJP tir ka ama yutsü. Aser high-command ajanga BJP Nagaland indang tir ka ama inyaksü atema kü nem temelaba agüja ali tashi ni maneni inyaksü," ta ashi.

(Maneni tapak 2 nung...)

NLA Speaker Sharingain national committee ka atema nominate süogo

Kohima, Aami/June 10 (TYO): Lok Sabha Speaker, Om Birla-i, Nagaland Legislative Assembly (NLA), Speaker, Sharingain Longkumer, committee ka nung züngoksemba metetdaksüogo. Constitution Tenth Schedule kübok Presiding Officers indang tashi lepa reprangshitsü atema nisung 4-i tentetba Committee nung pa züngoksemogo, ta Dr. P. J. Antony, Commissioner & Secretary, NLA-i metetdaksü.

Antony-i sangdong ka ajanga, "Lok Sabha Speaker-i, Sharingain Longkumer, NLA Speaker, Constitution Tenth Schedule kübok Presiding Officers indang tashi lepa reprangshitsü atema tentetba committee nung züngoksemogo," ta ashi. Iba Committee ya Rajasthan

Legislative Assembly, Speaker, Dr. C.P. Joshi lenisüba nung inyaksangshitsü, ta paisa metetdaksü.

Iba committee nung Rajasthan Legislative Assembly, Speaker Dr. C.P. Joshi mendenbuba aser Odisha Legislative Assembly, speaker, Dr. Surjya Narayana Patro, Karnataka Legislative Assembly Speaker Vishweshwar Hedge Kageri aser Nagaland Legislative Assembly, Speaker Sharingain Longkumer nung züngsem asütsü. Iba dak sendakba nung Lok Sabha Secretariat nungi tanü osang ka angazükogo, ta Antony-i ashi.

"Iba amala mesükba Presiding Officers indang Committee nung North East nungi Manipur Legislative Assembly, Speaker Yumnan Kemchand dang züngoksema lir. Pa Lok Sabha

Speaker-i tentettsüba, Legislature Secretariat Financial Independence ken o asadangtsü atema Presiding Officers indang Committee nung züngoksema lir," ta Antony-i ashi.

"Iba jenjang ajangzüksü atema Nagaland aser Speaker Longkumer langa lir. 10th Schedule kübok Petitions shilem karbo Nagaland asoshia lir aser pa iba Committee nung adenba ya Parliamentary democracy ajangzüksü atema asütsü," ta kasa sangdong ajanga metetdaksü.

Kasa mapang nung Advisor IT, Science and Technology and NRE, Mmhonlumo Kikon, Advisor for School Education, KT Sukhalu, Advisor to Chief Minister of Nagaland, Abu Metha nungeri Nagaland Speaker nem tenüngsang agütsüogo.

Covid putetaka meshirangertem pei kidang takdang balaka nung mongdaksür, idangji -





Pei alidak aser ayipdak mopong aittsüsa kichiba (window & ventilation) lapoka yuang.
 Akok tashi süngjanglijang aser süngolemba agi tua chiyongtsü tajung chiang aser tzü aser juice jemang.
 Pei meyong mobile phone, kumesü aser toothbrush nung ama melentepa tamshi.
 Mozü achitsü agüja lira, aji shitak chiang.
 Tango junga mesashitetba, teku ashiba, aketba aser temang metaba timtem lira yakta doctor bushiang.



Brehostibar nü Dimapur nung Dimapur Area Ao Baptist Churches & Civil Societies Co-Ordination Committee on Covid-19 purtemi Covid tongpang nung nokdaker non medical frontliner-tem ajurua sarasadem agüja jajaogo. Iba mapang parnok ajak dang parnoki pei mapa nung, nübertem meima, temulung agüja inyakba asoshi pelaba sayua 'refreshment' agüja liasü. Tanü ajuruba non medical frontliner-temji DMC Sanitation workers, police personnels aser Electrical department nung officers aser field staff-tem liasü. (Dimapur, June 10, 2021).

Rising People's Party o angazüka NPP bangkar

Dimapur, Aami/June 10 (Agencies): Taoba ACAUT mendenbuba aser tawa tentetba Rising People's Party tir Joel Naga-i jembiba o angazüka NPP Nagaland kanga tezüdanga bilemba, NPP Nagaland IPR & Media Cell sangdong ka ajanga metetdaksüogo.

Party tasen tentetba atema Joel Naga nem NPP-i tenüngsang agütsür, ajüsüka pai June 9 nü NC News Desk nem agütsüba osang nung par party-i election nung ken o balala dak ajemdaker tokteptsü saka tanga political party temi sen tashi amshia election akoktsü merangtsü ta ashiba olen NPP-i magizüker, ta kasa sangdong ajanga metetdaksü.

Ken o tejangja memeteti political party ajak yongrü kati idakja, political party tem tamendakdak tongtibangtibaji sen amshia election akoktsüba lir ta

ashiba ya tai ta NPP-i amanger. NPP-i, RPP ya ACAUT, Global Naga, Rising Naga teloktem ama dang ser nung yi tejen bottle tasen nung inokba asü ta temulung melemba bilemba lemsatop. Political party ajaki Covid wara mapang nübertem tenük lapokogo aser joko ojang dang anishitetsü ta angatetsüla. Kasa mapang nung nübertem political party tem indang ideologies aser inyakyim angateta lir aser kanga kümdanga asadangdar. RPP leniri teyazü tenangzükba agütsüba ajak pusemstü atema ken o agizükteter peria alitsü NPP-i imlaja ataba lemsatepba den pop corn mesera carbonated soda drinks ama jateta madok tsüngda tim o jembitsü NPP-i, Joel Naga ajungshiba kasa sangdong ajanga metetdaksü.

NPP amenokba mapang nungi nübertem atema nokdaka

arudar aser party tangatetba nungi masetshir, ta Joel Naga-i angatetsüla. NPP-i, "One Voice One Northeast" omen dak amanger aser iba dak ajemdaker inyaka aruogo aser yimden yimsüsüba nung ochishia aser mapatem odangtetsüsa inyaktüsü party tinyaktüsü tongtibangtiba lir. NPP-i, tetsür aser lanurtem ajungkettsü asoshi inyaka arudar aser lanur lenir Agatha K. Sangma (NE nungi tetsür Lok Sabha MP la kija lir), Dr. Wanweiroy Kharlukhi (Meghayala nungi Rajya Sabha nung MP) nunger amala lanur lenirtem ajungkettsüba atema nema danga bilemer. NPP-isa, North East India aser tribal welfare of India atema ajang ajanga nokdakogo aser iba dak sendakba nung nübertem kuli agütsütsü, ta NPP, IPR & Media Cell sangdong ajangasa metetdaksü.

Party telungzük nung mepetmesü... (TAPAK 1 NUNGI...)

"Parnok ji kechi mesüra parnok kodasütsü ta asüba indang o atsütepa jembitsü, saka ni tang tashi parnok akumtsüba lir, kechiaser parnoki parnok ya tang tashi Party nung inyaker tajung kaka lir ta shiogo," ta pai ashi.

Yimya masüba nung district tir nungi indok, ta parnoki tai tongloktsüba indang jembiba mapang, kodang district unit indang tiri BJP inyaksangshi nung shilem magitsü ta arur, langka kar matalok tashi magizüker, kechiaser onoki totuyuba sülen anidaker, ta Along-i ashi.

"Nisung kati inyaktüsü

memolungra ni kechi ashitsü," ta Along-i ashi aser pai parnok kodanga Party nungi memeindok, ta ashi.

"Tang tashi parnok Party pur aser BJP Nagaland nung züngsemtem lir. Parnok aliba atema pelar. Ibaji ajanga asenok tali shisa kadaktsür aser mera ka tali aor, kechiaser political party ka nung iba amala ya matalokra ibaji political party masü," ta pai ashi.

Iba ama timtem ya tir indang menden tendangba ka lir, aser tir indang menden ya kü meyong masü saka national BJP tir J P Nadda-i anir aliba BJP meyong lir,

ta pai ashi.

Tir menden nungi indoker alirtemi Party ajanga tir inyaktüsü shimtetba indang kulikaket lir ta jembiba dak sendakba nung, "Nia election certificate ji lir... küdang anendang ta ashiba anogo anentsü, aser ni aotsü," ta Along-i ashi.

"Onok ya high-command national party ka lir aser ozü high-command ajanga telemtetba tajungtiba meteta lir."

Nagaland nung aliba BJP nung nia high-command ka lir, aser parnok ya BJP indang karyakartas tajung kaka lir, ta Imna Along-isa ashi.



Dimapur district kübok Aoyim yimtak Village Development Board ajanga Village Council den longjemer Covid-19 tashidak wara ajanga timtem ajururtem rongnung ration card makar kibong 184 nem June 9 nü dokan nung jang alia lemtsütsü renemba noksa nung angur. Parnoki jang agütsüba den külemi ano May ita indang Aoyim yimtak alir kibong ajak indang light bill agütsütsü telemtetba agiogo. Parnoki inyakba amato yimtsüng ajak nung VDB aser Village Council longjemer timtemertem yarikdaksüner ta Aoyim nung yimten yimsüsür aser lanur tanishirtemi metetdaksüogo. (Dimapur, June 10, 2021)

Kohima nung salon raksatsür jangjaogo

Kohima, Aami/June 10 (TYO): The Kohima Police-i Brehostibarnü, Kohima nung salon ka raksatsüba nung aibelena alir tanur (juvenile) asem jangjaogo aser Juvenile Justice (Care and Protection of Children) Act dak ajemdaker jenjang tapet agidar, ta ashi.

Kohima kübok MK Market complex nung Eklippz hair & beauty salon ya Hombarnü rakpoka ir raksatsü aser sen lakh 3 shi alang osettsütem raksatsüba den sen 2000 auyar oa liasü.

Sub-Divisional Police

Officer (SDPO)-North, Yambemo Humtsoe-i, "iba ken o nung tanur asem densema aliba jangjaogo aser Juvenile Justice Act dak ajemdaker jenjang tapet agidar," ta ashi.

Kohima police-isa, Twitter ajanga ken o renloka aoba indang metetdaksüogo. "MK Market Razhü Point nung Eklippz Beauty Hair Salon raksatsüba den sen auyar aoba ken o dak sendakba nung tanur asem densema aliba jangjaogo. Ken o dak sendakba nung JJ Act dak ajemdaker jenjang tapet agidar," ta police-i tweet asü.



Artang Baptist Arogo nung mission board ajanga temulunger tenla bendener, Artang mepu nung covid 19 positive aser home isolation nung alir nem agütsütsü chiyongtsü renemtsüba noksa nung angur. Tanü parnoki nisung ajak agi 160 nem parnok mulung süngzükja sarasadema iba teyari ya agütsüogo. (Mkg. June 10, 2021).

PM Modi-i linük asoshi...

(TAPAK 1 NUNGI...)

State nung makamaiter aika teyari agitsü atema ration card mali asünung, Cabinet Minister ka ama Imna Along-i shidakba makamaiter teyari anguba nung yaritsü atema ken o ya state aser central sorkari dangi abentsü, ta ashi.

Angati agütsüba jang-o-tzü agizükba mapang Fair Price Shops aser putu menden dang sen meshitsü melar asü, ta asüngdangba mapang, shidakba card bena alirtem aser tejangja makamaiter (Below Poverty Line) dang sen memeshitsüla, ta Minister Along-i ashi.

Jang-o-tzü angati lemma agütsüba mapang sen meshira sorkar nem osang agüjang, aser sorkari tapet temerenshi agütsütsü, ta ashi.

Centre-i arishi küm 18 nungi tema senso ajunga nem COVID-19 mozü angati agütsütsü lemtetba atema Nagaland BJP tir Imna Along-i pelaba lemsatepa liasü.

Mozü ya ajak atema lir, aser angati mozü agütsüba ajanga taküm küm tatem tashinung nübur timba COVID-19 mozü agijemtsü imlar, ta pai ashi.

Mozü agütsüba maparen ya Centre-i aziöker alinung, mozü ya tekeratiba nung timi lemja teimla tajung nung tashidak wara den raratsü, ta ashi.

State nung COVID-19 tashidak wara ketdangsuba aser aziökba maparen balala meranga inyakba atema Chief Minister Neiphu Rio-i aniba High Powered Committee, Health Minister S Pangnyu Phom, Health Department aser frontline worker tem dang Minister Imna Along-i pelaba shia liasü.

Ajisüka sorkar, department aser frontline worker kisüngi iba tashidak wara den raratsü makoktsü, anungji nübertem, civil society temi maneni

lungjemer nokdaksüla, ta pai ayongzük.

COVID-19 ya asenok den mapang tatsükabo alitsü, anungji nübertem yimya tasen nung alitsü angazüktsüla, sorkari SOP sangdongba sülen anidaksükla, aji asünung dang lockdown tenokdangba ajemtsü aser akhi ama akumtsü, ta pai ashi.

Iba senden nungsa State BJP Spokesperson aser Noklak District In-charge, W. Ngamha Konyak-i ashiba agi, "Seva hi sangathan" (service only is organization) omen kübok Nagaland nung BJP ajanga lockdown mapang maparen balala inyaka arur.

May ita BJP Nagaland ajanga mask 42,310, sanitizer litres 12,620, immunity kits 6,760, aayanga jajar nem angati chiyongtsü talep 16,100 agütsüogo aser yimdaklir 10,251 thermal scanning agia liasü, ta pai ashi.

Ajidang masü district balala nung mürekmejuba sentong ayongzüka agi, yimtsüng 56 nem medical teyari agütsü, frontline worker nem N95 mask 25,000 lema agütsü, ta Konyak-i ashi.

BJP ajanga state nung Health Sub-Centers, Primary Health Centers aser Community Health Centers 350 nem PPE suits tem agütsüogo aser ano maneni hopta ana tsüngta PPE tem health center ajak nem agütsütsü atema mera agitsü, ta pai ashi.

Lockdown matem tashi State BJP ajanga makamaiter aser teyari nungdaka alirtem maneni yaritsü, ta Nagaland BJP tir Imna Along-i shisem.

Teyari aginürtemi State BJP 24x7 helpline number 9863061767 nung tongtepreteptsü akok, ta BJP Nagaland spokesperson Nini Cheng-i ashi. Iba senden nung State BJP Mahila tir, Phangnon Konyak-a dena liasü.

Tripura: Temesepba mozü shibelener 125 puogo



Tripura Police-i ozüing alema temesepba mozü apuba noksa nung angur. (File photo)

Agartala, Aami/June 10 (Agencies): Tripura Police-i ozüing alema temesepba mozü ayokba aser shibelenba nokdangtsü atema sentong tapet yanglur kanga takok ngua inyaka arudar.

Tripura kübok West district nung January ita nungi tenzüker tang tashi nung temesepba mozü shibelener 125 puogo.

Tesepba mozü anema tongbang ayongzükba sülen, Tripura Police-i state kübok West district nung temesepba mozü shibelenba aser achiba nokdangtsü atema sentong balaka ayongzüka agidar.

Additional Superintendent of

Police, West district, Bogati Jagadeeswer Reddy-i ashiba agi, district nung temesepba mozü ayoker aser shibelenertem aputsü atema police temi kanga bendanga agüja inyakdar.

"Onoki sentong tatongi yanglur anti-drugs drive ka ayongzüka agidar. Iba sentong ya itangitertem aser ozüing alema inyaksangshiba tesemtem nungi osang tejangja agir benoka inyakdar. New Capital Complex sub-division, Sadar aser Amtali sub-division kübok tesem kar kanga junga meita odar," ta West district Additional SP-i ashi.

"2021 küm January ita nungi tenzüka onoki temesepba mozü shibelener 125 puogo aser ken o 50 benokogo. Tang tashi nung onoki ganja seret 1500, phensedyl bottles 11,967, Yaba tablets 15,951 aser heroin gram 600 shi puogo," ta pai ashi.

Tawa Tripura sorkari temesepba mozü amshiba ajanga timtem bener arutsüba nokdangtsü atema "Nisha Mukto Tripura" drive amenokogo.

"Iba sentong ya DGP lenisüba nungi inyaker aser Agartala dak tali rangloker inyakdar, kechiyong iba yimti ya state yimtiba lir," ta Additional SP-i shisem.

Piles Cure Centre - Kabiraj dang alakteta pelaba metetdaksür. Piles, Fistullah, Gastric, Sinus, itching, Tonsil-Ajma aser Diabetes agi ni kangshia liasü aser Rectum nungi azü alu dang mapang talangka item timtem nungi junga taneptsü mang. Ajisüaka, tang **H. Umar Chesam contact no.8416087414 / 7627998690** Address: Burma Camp 2nd Police point opp. tetuyuba nung anidaka surgery kecha magii (non-surgical) anepalur anogo ishika tsüingda ni taneptsü ngua liasü aser iba sülen tanü tashi kü temang nung timtem kecha mali. Time: 7 AM - 3 PM -Yours sincerely - O. Lotha, Add: Purana Bazar



Meghalaya nung vaccine magir-tem nem leave magütsütsü

Shillong, Aami/June 10 (Agencies): Meghalaya sorkar kübok mapa balala nung inyaker dang COVID-19 vaccine agitsü atema sorkari tetuyuba agütsüogo.

Tawa jenjang tasen ka agia Meghalaya sorkari State Secretariat aser tanga sorkar office tem nung inyaker arishi küm 45 aser temapur ajak dang vaccine agitsü atema tetuyuba agütsüogo.

Vaccine magiba employee tem COVID-19 tashidak menara special leave agitsü atema maongka magütsütsü.

Meghalaya sorkar tetuyuba ka ajanga ashiba agi, COVID-19 tashidak menatepyonga aoba nokdangtsü aser public health aser safety temulungdang yur iba jenjang agiogo.

"Vaccine agir alirtem nem COVID-19 tashidak menara special leave agütsütsü, ajisüaka vaccine magi alirtem nem iba maongka ya magütsütsü," ta sorkar sangdong ajanga metetdaksüogo.

Meghalaya nung tang tashi nung nisung 4,80,147 nem COVID-19 vaccine agütsür lir.



Spear Corps Assam Rifles temi June 8, 2021 nü Indo-Myanmar arrtsü anasa yangko ka nung 9mm Pistol, magazines asem, Chinese Hand grenades ana aser injang kar ngutet aser ano June 9, 2021 nü KNA telungpur ka apuba yangi noksa nung angur.

Mizoram nung Brehostibarnü nisung timba dak Covid potet

Aizwal, Aami/June 10 (Agencies): Mizoram anogoshia tashidak potetyonga aruba rongnung Brehostibarnü nisung timba dak Covid-19 tashidak potetba sangdongogo. Taoba ghonda 24 tsüingda nisung 347 dak tashidak potetba sülen state nung tashidak menar 14,534 jungogo, ta ketdangsur sangdong ka ajanga metetdaksü.

Ketdangsurisa, anogo ka indang infection rate ya 10.39 per cent liasü, kechiyong sample 3,337 tendangba rongnungi 347 dak Covid-19 tashidak potetogo, ta ashi.

Brehostibarnü tashidak potetertem rongnung Aizawl district nung 246 aser Kolasib o Lawngtlai district nung 50 aser 31 liasü.

Tanungba nisungtem ya Lunglei district (12), Saitual district (5), Siaha district (2) aser Khawzawl district nungi ka liasü.

Tesüsa tashidak potetertem rongnung tanur 81 densema lir,

ta ketdangsurisa ashi. Tashidak potetertem rongnung parnok 13 tangalen senzusenpongba kuli lir aser tanungba 335 ya state nung tashidak menaba lir, ta paisa ashi.

Shiranger 148 tashidak menaba tera tang tashi mejangjai lir," ta pai ashi.

Tashidak menar alir 347 rongnungi 188 dak tashidak keta aliba temaitsü sayudar.

Mizoram nung tang covid tashidak menar nisung 3,585 temang anepaludar aser nisung 10,891 anepogo.

Bodhbarnü Covid-19 Care Centre balala nungi taneptsü ngur nisung 122 pei kidangi meypaogo.

Kasa mapang nung Mizoram nung recovery rate 74.94 per cent aser tasüba 0.40 per cent lir. Tang tashi nung tashidak agi nisung 58 süogo.

Mizoram nung tang tashi nung samples 4,21,135 tendangogo.

State immunisation officer Dr. Lalzawmi-i ashiba agi, nisung 2,77,502 nem COVID-19 vaccine mezüngbuba dose agütsüogo aser Bodhbarnü tashi nung nisung 52,826 nem vaccine tanabuba dose dena agütsüogo.

Kasa mapang nung bushitsüingdang ka ajanga Mizoram yimtiba Aizawl nung COVID-19 tashidak menar shilem 85 bo medemer aser kidangertem nungi menar ta ngutetogo, ta health department ketdangsur kati Bodhbarnü ashi.

Covid-19 medical operational team kati bushitsüingdangba ajanga Aizwal nung Covid tashidak menar shilem 85 bo kidangertem kati ka semdangtepba aser medemertem den ajurutepba ajanga menaba ngutetogo. State mokdang aliba mapang tenokdangba balala agütsür liaka kiyonger aser medemertem ajurutepba ajanga tashidak tali menateper, ta ketdangsurisa ashi.

Assam CM-i family planning policy tapet benoktsü mepeshi

Guwahati, Aami/June 10 (Agencies): Assam Chief Minister Himanta Biswa Sarma-i Brehostibarnü lokti nung nütsüing agi ajema aliba teloktem dang, sensak tia nungi jenbotsü atema nütsüingyongsük tali renloba azüoktsü asoshi "family planning policy" tapet benoktsü mepeshia metetdaksüogo.

Lokti nung stakeholder tem ajaki sensak tia tajemba kümdaktsütsü atema sorkar nem teyari agütsütsü asoshi tejakdang arutsüla, koba

tazüokba makai nütsüingyongsük tali renlokyonga aoba ajanga lir, ta chief minister-i ashi.

"Sorkar ya sensakertem anepalur lir, ajisüaka lokti nung nütsüing agi ajema aliba teloktem nütsüingyongsük tali renloka aoba ken o bentetsü atema teyari agütsütsüla, koba sensak tia aser illiteracy tera lir aser iba ya family planning shidak benoka minyakba ajanga lir," ta pai ashi.

Sarma-isa, sorkari item lokti nung tetsürtem nem kaket

shisatsü agütsütsü atema inyaksü, ajita asünungdang iba tebilemstü ya bentetsütsü, ta ashi.

Sorkari, temple, Satra aser arem atsünga aotsü memelatsü aser item lokti züngsemtemia sorkar dang, parnoki item alitem atsünga moner ta shiogo, ta pai ashi.

Chief minister-i, lokti lenirtem dang nütsüingyongsük tali renloka aoba azüoktsü atema lepa reprangshitsü aser nüburtem ajungmesotsü mepeshia metetdaksü.

Tripura nung temzüng ozüing mali: CPI-M

Agartala, Aami/June 10 (Agencies): Tripura CPI-M State Committee senden amenba mapang, state nung temzüng ozüing shidak benoka inyaksangshi masür ta shiogo.

Tripura CPI-M state committee senden nung state dak sendakba ken o balala benoka sensaksemogo, kong state nung temzüng ozüing shidak mebenokba aser COVID-19 wara indang onük densema lir.

CPI-M-i ashiba agi, state nung temzüng ozüing chirepogo.

"Nisung tepsetba, masütsüyim agi asüba, tetsürtem tashiyim agi raksatsüba timba timba küma odar. May ita kija nunga nisung 24 tepsetogo, tetsür 12 tashiyim agi raksatsüogo, masütsüyim agi nisung 39 süogo, ta sorkar otongdari metetdaksüogo. Nisung tepsetba ken o aika soseta asüba ama kümtsüogo," ta CPI-M-i ashi.

"Chief Minister-i Legislative Assembly nung jangja jangja tenangzükba agüjaka,

opposition political party tem nungi lenirtem aser MLA tem maneni maka arudar," ta CPI-M-i ashi.

CPI-M-isa, Angh-i tenangzükba agütsür liaka taoba hopta pezü tsüingda state kübok sub-division balala nung lenirtem maka arudar, ta ashi

"Kamalpur nung security personnel temi meketbanger, curfew benoker aliba mapang minister-i yimjak nung CPI-M office atsüing aser party lenir aser activist tem ki amak tenzü. Ken o ka nung danga police temi lenirtem amakertem mapu," ta CPI-M-i ashi.

Maneni CPI-M-i ashiba agi, BJP kübok inyakertemi Covid-19 agi kongshir aliba kibongtem nem teyari agütsüba nokdanga arudar.

"State sorkari covid azüoktsü atema sentong tejangja ka yanglua mali. Physicians, health worker tem anisema mali. Sorkari curfew benoka parnok khuret nungi jenboa alitsü meranger," ta party-i ashi.



TIR YIMYIM YIMOBILEM (EDITORIAL)

DIMAPUR ROGONÜ, AAMI (JUNE) 11, 2021

Kanga pelar ta ashiba tashi

Atangji, tang ama alima tashidak wara tamajung den nübör ajak pei pei akok shilem agia raradang bangdak nung alir karbo tezüdangtsüka lir, O o mapa na mesütep, tejakbo mangur saka tagitsübo onsara metet. Shitakba shingaia shinga mapayu inyakdi asübo corona wara ya toktsür, mask-a ajak agizüka yur itemji tama bushia ashishitepnütsüka, ajisüaka ibai tai bushiba mapang masü saka nübortem taküm kümzüksüba mapang, anungji aitsütsüba tesemji mangu ama toktsür pelaba lemsateptsüsa tesem kar danga lira, yangji oagi pelatepa kati ka ajungshitepa tashidak wara tongpang nung nokdak tajungba asütsü. Aji oda, asenoki jungjunga bilemdangra, asenok mulung machitsüsa inyakba mapatem dang nungibo asenok pelatsüsa inyakba mapatemang teimbaa ta asenoki angatettsü. Asenok aiben mepelabaji asenoki azüklen alirtem dak dang rangloker ibayongji mepelar, ajisüaka kodang asenoki alilen angüma lur repringdangdir, alilen nisung aika asenok asoshi anogo shia anü apu tsünglu aru ta mali, tashidak wara ali asü maliar memetet, tangar mesakdang yakta saker yimti yimdong aokertem, electric light tesangwa yokertem aser amang sangwa metitemi yimti mita anükertem angutsü. Azüklen alirtembo junga inyakyonga meinyokyonga anogo shia kari shitakba agi aser kari langka yimlaba agi pelaba shijen ashir, saka alilen amen nokdak maka, teshinem asü teronemar mebendangtet, amang sangwa ta mali yimti topur jungdaktsünüyong aser nübortem anisüngzükdaktsünüyong, ita sen angu asü manguar memetet inyakertem dangbo tepela o ka ashir mali, mapa tasakbo ajak parnok, saka tenüngsangbo ajak tangar agir ta asüba purtem aika asenoki angutsü. Atangji, parnokji mozü kidang inyakertembo masü saka tanü Covid-19 tongpang nung ajangajanga nokdakertem rongnung parnoka wajak purtem lir. Aji oda, tang ama mapang ya, item ama nübortem, shirnoki tashidak menaa metsübui anogo shia pei mapa shitak inyaker, parnok mapa, taküm aser kibongtemji repringteta asenoki parnok dang 'kanga pelar' ta ashitsübaji senso shia mapa asütsüla. Mapa tajung inyakertem dang 'kanga pelar' ta ashitsübaji tasak masü aser shinga nungia temelaba abentsü menüngdaker, ibaji angati, kodang inyaknüdir inyaktettsüba mapa lir, ajisüaka iba jagi nisung taküm ka nung tepelabo tuluka bener arutsütettsü. Iba tangatetba nung tang ama tashidak wara tesashi den raradang asenoki anepdang ka yimti aokertem bushia oagi mesüra asenok kiyongi parnok arudang tzü tajemtsü danga pongdang ka agütsür kanga pelarago ta shira, parnok mapaji iba nepjisa tajungba asütsü. Iba kasaji asenoki yimdong nung aser asen kidang aruagi yindong nung suzua light yanglutsürtem dang kanga pelar ta shira, idangji parnok temang anibelem ajak amadoker tashi tasen angutsü. Iba kasaji asenoki mitkartem bushia orr kanga pelar ta shia sarasademtsüra, iba jagi parnok mapa nung küm kümshitsü. Nisung asoshi tashi angudakji chiyongtsü tajung dangbo masü saka chiyongtsü tajung dang nungibo tepela nungi anguba tashijisa tuluba lir. Chiyongtsü tajung chiaka pelaa melira tashidak agi akoktsü, tulur aser takar süaka pelaa melira tashidak nem moksepdaktsütsü. Shiba südir süang nisung ka nem mapa junga inyakdaktsünüra, paji peladaktsütsüla. Aji oda, tajungshi o rongnung tajungtibaji 'kanga pelar' ta nisung ka dang ashibaji lir. Iba jagibo memeteti temang nung tashi tasen aruadoker aser tepela mulungjang tasen kati melentsür. Aji oda, tepela mulungjang adenba nisung jagibo pei mapa nung temulung agüja inyaktsü, alima meimtsü, lokti yaritsü aser yimjung mapa inyaktsü. Item ajakji asenoki kenü mapang ka agitetter, mapa meranga aser junga inyakba nisung ka dang 'kanga junger, kanga pelar' ta ashiba nungi tenzüksü. Iba tenzüksübaji tang Covid den raraba mapang yasa tapetba aser tajungba lir.

OLEMSABANG

COVID-19 VACCINE AGIBAJI TSÜNGREM ANEMA ASÜ ???

~ L. Kika Pongener

Tawa tanü Mass Media balala nung karibo COVID-19 ajem (Vaccine) agibaji Tsüngrem dak tamang makaba, Tsüngremi memulungba, mesura temenen amai otsü/osang kanga bulua jembir/angashir, ibajagi nisung aika rata-mataa mangmangteper. Iba ama otsü/osang angashidang asenoki asen shisatsü kisung agi masü, saka laishiba-ia kechi ashir/sayur (?)...ta bushitsüla. Yisu-i Farise-tem dang o entepba ashiba, "Anema alirtem asoshi mozü shiteter nungdak mali, saka shirangertem asoshi tenungdaktsü" (Mathi-9:12). Yisu-i iba o entepba nung indang-indanga dang, shirangertem atema mozü shiteter (Doctor) tenungdaktsü ta shia angur. Yisu-i ashiba nungjagi asenoki angateter, shirangertem asoshi mozü shiteter tenungdaktsü. Surabangla, COVID-19 tashitak agi shirangertem atema-a mozü shiteter nungdaktsü.

Ano tanga mapang ka nung, Yisu-i tasodang nungi tenuk tapok asoba nisung ka ajuru, iba anogo nung Yisu-i iba nukpoksangji aneptsü. Yisu-i iba nukpoksang aneptsübaji koma ser aneptsü ta repringdangra, Yisu-i metsü (Saliva) metsür ali meyokteper lishi kuma yanglur, tenuk nung mezütsü/nuloktsü, aser oang Silom tetezü agi Yok, tzütu nung shitokang ta ashi (Yohan-9:6-7). Yisu-i nukpoksang dak lishi mezütsübaji mozü mezütsüba ta asenoki angateter, aser tzütu nung orr shitokang ta ashibaji, asen sasa inyaktsü mapa kar agütsür ta angateter. Asenok shirangdang Doctor dangi aor, Doctor-i asenok nem mozü agütsür aser shi/ango machitsü/sungolemba dang achitsü...ibala mesuka asen sasa inyaktsüba mapa kar agütsür.

Ano Yirusalem nung san sungkümbong anasa Bethzaitha ta ajaba tesem nung 'Semtu' pongu aliba awatzüng ka liasü. Idakji nukpoker, tsüngtsüker, yareta shirangertem jenti, awatzüng nung tzü arakzüba ata-a mejanga liasü. Kechiaser iba awatzüng nungji, mapang shia Tenyar ka awatzüng jagi aitsü aser tzüji arakzüdaktsür, aser shiranger semtu nung mejanga alirtem rongnung tzü arakzüa alidangji shiba tamasa pungokdir taneptsü angur. Kenu anogo Yisu iba anasa ajanga suidang, küm semer-ti shirangba nisung ka liasü. Iba nisung küm semer-ti tashi awatzüng anasa semtu nungji tzü arakzübaji ata-a liasü, saka tzü arakzüdangji pa aniochtsür teyarir shinga maliba agi küm paikaji timtema aliba ngua Yisu-i ashi, "Nokdakang, ne yipden benang aser jajang". Aser idangyongji küm semer-ti yareta shirangba nisungji anepa-adok. Idagi Yisu-i küm semer-ti yaretsang ya Yisu teka agi attsümesor, Yisu teka agi anir jajadaktsüba masü, saka nukpoksang pa sasa noktadakttsü, pa sasa pa yiptenji bener, pa sasa jajadaktsüba angur. Yisu-i nukpoksang aneptsü asoshi pei sasa inyaktsüba mapa agütsüba asenoki angur (Yohan-5:2-9).

Atangji, asen tashitak aneptsü atema Yisu-i aneptsüba kisungji masü, saka asenok sasa inyaktsüba mapa kar lir ta tejangja angateter...Tetezü Yisu-i aneptsütsü, saka iba denji asenok-ia asen sasa inyaktsüba mapa karbo lir ta lesson angur. Bethzaitha awatzüng anasa aliba semtu-ji, tanü asen putu nung Hospital den mesukteper, kong shirangertem taneptsü angutsü atema idakji oa mejanger/amunger. Aser kodang awatzüng nung tzüji arakzükdir semtu nung mejanga alirtem ajangaji khenyongi taneptsü angu masü, saka shirnok tzü arakzüa alidang, awatzüng nungji tamasa pungokdir parnokji dang taneptsü angu. Aji oda, Tenyar jagi aneptsütsü ta yimla-a ata-a meli-i, tzü arakzüa alidangji kara-a pungoktsüla, iba mapaji shitak tashi anga-a inyak nungdang tashitakji aneptsü. Iba nungji-a pei sasa inyaktsüba mapa kar aliba angur. Ano tejen lai nung züngdangra, chubatem mapang nung Siria chuba'er temeranger telok madak walunir Naman zütsüra keta liasü, aser iba zütsüra aneptsü atema Samaria nung aliba Elisha ainkar dangi ao. Aser Elisha ainkari Naman dang ashi, "Oang aser Yordan nung tenetben shitokang aser na meruka alitsü". Idagi, Elisha ainkari Naman dang Yordan ayong nung tenetben shitoktsü ashi, ajioda, Yordan ayong nung yima aliba 'Tzü'-ji Naman zütsüra aneptsü asoshi mozü-baji liasü...ta asenoki lesson angur. Ajiser, iba ayong nung tenetben shitoktsü ashibaji pai pa sasa inyaktsü mapa kar agütsüba ta angateter. Ajisuaka, kodang Naman-i iba o-ji angashi, pa ain adok aser ashi, Israel nung akaba tzü ajak dang nungi Damaska nung aliba ayongtem 'Abana' aser 'Farpar' tajungba masü no ? Ni itum nungji orr shitoker meruka melitettsü no ? Idagi, Naman-i Elisha ainkar-i teinyaktsü ashiba/tuyuba nung tamang makaba, pa sasa pai metetbaji tang shitak ta temulung alemba, aser tashi mangali asüba lesson ka angur. Saka Naman tenzükeri pa dang ainkar-i ashibaji tashi anga-a inyaktsü ashinung, Naman-i Yordan ayong nungji tenetben pungoka shitok, aser idangji pa shi tanür tila shi ama meruka aküm aser anepa-adok (2 Chuba-5:1-14).

Itum laishiba tekongtem nungjagi asenoki COVID-19 tashitak nungi taneptsü angutsü atema-a mozü/ajem (Medicine/Vaccine) agiba nung kecha aibelen malitsü sudi ta angateter. Hau...tashitak karbo asen temenen/aibelenba ajanga bena aruba alitsü akok, ibala-jibo asenoki Tsüngrem dang lumia tatok meshi nungang taneptsü angutsü akok, saka ajakbo yamaji masütsü. Aluyimertema Tsüngremi moatsütsü ta ser alu nung metsü (Seeds) meinok ser, oda tsük aika rodakjang ta...lumia sarasadema amungba agibo alu nung tsük marotsü. Kaketshirtema Tsüngremi takok ngudaktsütsü ta ser lesson mazüng, oda lumia sarasadema kazüba agibo takok mangutsü. Kechiyong asenok-ia asen shilemjibo inyaktsüla, tetezü...mozü/ajem-jibo agitsüla, aser Tsüngremi tanüngba pa shilemji inyaktsü. Yisui nukpoksang dang, "Silom ayong nung shitokang" ta ...Küm semer-ti yaretsang dang, "Nokdakang, ne yipten benang aser jajang" ta... Elisha ainkar-i Naman tang, "Yordan nung tenet-ben shitokang" ta ashibaji, tang SOP-i anogo tenet/ter-pezü quarantine asütsü, mask agitsü, teka metsüktsü, nisung tsüngda tepila ayutsü, lokti madenshitsu etc. ta ashiba den tepila mali. Yisu-i nukpoksang dak tenuk nung lishi mezütsüba/nuloktsüba ama, kechi mozü/ajem agitsü ashir/tuyur kecha meratai agitsüla-a...ta angateter. Aji oda, aseni tashi mangara, ibajagi asen dang masü tangar dena timtemdaktsütsü. Asenoki Naman ama pei angatetba aser metetbaji tang shitak ta aibelen mangatetli. Hau, Tsüngremi yaritsü/aneptsütsü, saka asenok-ia asen shilem teinyaktsü mapa karbo lir, itumji tashi anga-a inyaktsüla.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

Georgia nung Arogo kati Food Ministry nem chiyungtsü den tenla agütsü



Coronavirus wara mapang Georgia (US) nung Macedonia Arogo Food Ministry-i chiyungtsü lemtsüba noksa nung angur.

June 10, 2021: Tang coronavirus wara mapang nung timtemertem yaritsü atema Georgia (US) nung aliba Arogo kati tanga Arogo indang food distribution ministry ka nem dollar sen 10,000 dak tema den chiyungtsü pound 8,100 agütsü.

Amongnü (June 6, 2021) Wesley United Methodist Arogoi Grovetown nung aliba Macedonia Arogo nem sen aser chiyungtsü tenla agütsüogo.

Tawa interview ka nung jembidang Wesley United Methodist Arogo nung Communications Director, Milledge Austin-i, Arogoi chiyungtsü pound 8,100 den dollar 10,456.83 tenla agütsüogo, ta metetdaksü.

"Küm tasen tenzükba mapang ozü staff kari nüburtem tenzüksü atema apiteta liasü. Lemluwa mongpu nung kibong aikati school nung chiyungtsü atema tanurtem nem chiyungtsü

magütsüteter. Anungji lemluwa mongpu piyong Columbia County nung tanurtem nem chiyungtsü agütsütsü onoki lemtet," ta pai metetdaksü.

Austin-i, "Food ministry nem tenla agütsüba sen ajakji ozü Arogo nung temelungertemi tenlaba lir; coronavirus wara mapang nunga ozü Arogo nung züngsemtemi kiyongertem yaritsü melunga tenla agütsü," ta metetdaksü.

Yaküm coronavirus anema linük shibangba mapang nung Macedonia Arogoi food distribution ministry tenzuka liasü, aser iba mapang nungjagi tenzuka tang tashi nung food ministry-i nisung 50,000 dak tema nem chiyungtsü agütsüogo.

Wara tamajungba mapang nung Arogoi hopta shia nisung 1,000 dak tema mesüa liasü aser wara süngjamba sülen tangbo hopta shia nisung 200 shi dang

mesüdar.

Wesley United Methodist Arogo nung senior Pastor, Greg Porterfield-i, Macedonia Arogo nem tenla agütsüba toktepa inyakba mapa ka masü saka food ministry ana tsüngda yaritepa inyakba lir, ta metetdaksü.

"Macedonia Arogoi yaküm nungi iba ministry inyaker ta onoki osang angazükba sülen onokia par Arogo Food ministry nem tenla agütsütsü apitet," ta pastor-i ashi.

Austin-i ashiba agi, tang mezüing Arogo anati longjemer nüburtem tenzükba, aser tarutsü nunga maneni Arogo ana longjemer maparen balala inyaksü imlar.

"Onoki Tsüngrem temeim aser osangtajung prokner. Amongnü anepdang Tsüngrem külemba dang masü saka asenek meküta alirtema yaritsü nüngdak," ta paisa shisem.

IRF Summit nung Middle East nung reshikangshiba onük jembitsü

Washington, D.C., Aami/June 10 (Agencies): Washington D.C nung anogo asemnü (July 13 nungi July 15) tashi International Religious Freedom Summit aliba mapang nung Middle East linüktem nung Khristantem densema minorities reshikangshiba aser religious freedom anema inyakba atema jembitsü.

Iba Summit ayongertem-taoba mapang Ambassador at Large for International Religious Freedom, Sam Brownback aser Lantos Foundation for Human Rights Tir, Katrina Lantos Swett nati iba senden nung shilem agütsü atema o jembirtem aika jaokogo.

IRF Summit nung Middle East nung religious freedom atema tang teinyakdak mapatem asadangsü, Middle East nung nisung jenti tepsetba nokdangsü aser teyari agütsütsü atema jembitsü aser Middle East nung takoksa angurtem- Khristantem densema minority religious groups tebilemtsü onüktem jembitsü.

Tawa US nung Joe Biden administration-i World War I mapang nung Ottoman Empire-

i asalentong yanglur Armenia nung Khristan jenti tepsetba-Armenian Genocide agizükogo.

Iba dak alia 2020 küm Armenia-Azeri rara ajanga Azerbaijan aser Turkey nung na tsüngda tsükchitep tuluba kümogo aser linük anaprongla nung Armenia nung Khristantem kanga takoksa ngudar.

Summit nungsa Turker-Armenia tesendaktep aser kiralongrar telok- Islamic State of Syria and the Levant (ISIL)-i Iraq o Syria na nung Yazidis, Syria aser Iraq nung Khristantem anema inyakba atema jembitsü.

Region nung Khristan densema minority religious groups meshimeshia samatsütsü nükjidong nung ISIL teloki nisung merirjang aika tepsetba den külemi tetsür aika puogo.

Summit nungsa Middle East nung tashi tali amshiba sorkartemi temelaba agüja minority religious groups anema inyakba atema jembitsü.

Middle East nung Muslim nütsüng timba aliba linüktem nung Tsüngrem mezüingmeshiba ozüngtem nung ajemdaker

Khristan lenirtem aika pua lir, aser meimchir temeden alema parnok aika reshikangshiogo.

May 26, 2021 nüa Iran nung Khristantem aseme Islam yimsü anema osang tai proker ta tai tonglokja apu. Police-i parnok kidangji Khristan kakettem angu.

Kasa senden nungsa Ecumenical Patriarchate of Constantinople nung tongti putir, Elpidophoros-i religious nationalism kanga bulua akümba indang jembitsü.

Turkey linük nung Tir, Recep Tayyip Erdogan yimsüsüba kübok Islamic nationalism ajanga Orthodox Khristantem kanga timtemer. Turkey linük nung Khristan aser Muslim nung naprongla atema kanga nüngtugu nüngshi kiojen- Hagia Sophia museum aliba nungi mosque kümba yanglushiba ajanga linük nung Islamic nationalism ainba jangjar.

IRF Summit nung nisung aikati Middle East nung religious freedoom maliba indang kuli ashitsü. Iba senden nung adentsü atema Summit indang website nung registration maneni agidar.

ANOGO ABEN TSÜNGREM DEN

Ochi jagi na nüji kümdaktsütsü

"Aser nai ochiji metettsü, aser ochi jagi na nüji kümdaktsütsü." Yohan 8:32.

Tsüngremer ochibai kodanga na menokdang; iba yagi na teti nüji kümdaktsür! Na tasü meiti lir asü? Temenen kar madak takok mengui lir asü? Lendong aketba chiyong kar lar kümba lir asü? Tsüngrem indang ochibai na nüji kümdaktsütsü ta mangateti alitsü akok.

Ne jakdang tayongzükba den ajuruteptsü na tasü meiti lira, Filipi 4:13 nungi tasü aittsü angazükang: "Khrista shibai ni tasü itdaktsür Pa ajanga ni ajak inyaksü akok." Tensa ajanga nai tamakok ngua lira, Rom 8:28 nung shia aliba nung azüitang. "Tsüngrem meimertem asoshi mapa ajak tajung asoshi inyaker." Na temenen kar lar kümba lira 1 Yohan 1:9 ochiji ne taküm agi inyakang, koba nung nai temenen nangzükra, memeshiba ajak nungi na merüktetdaktsütsü Tsüngrem tamang katetta lir. Item ajak ne taküm nung Tanela Temeshi-i inyaksü ataa lir.

Ne taküm nung Tsüngrem ochibai mapa inyakba metettsübaji ano mapa ka lir. Tsüngremer ochibaji nai magizükra aser mamangra ochi jagi ne taküm nung mapa meinyaksü. Tangar taküm nung mapa meinyaksü. Tangar taküm nung Tsüngrem aini mapa inyakba nai angashia alitsü akok. Saka item ochibaji ne taküm nung inyaksü nai Tsüngrem dang melaa lir ma? Tanü nü taküm nung ochi inyaksü Pa dang asüngdangang.

Pakistan nung Khristan lenirtemi 2017 Census report ashishir

June 10, 2021: Pakistan linük nung Khristan lenirtem aser yimtenren lenirtemi tang tesüsabuba Pakistan nung 2017 census (nütsüng züngdangba) osang ashishir, ta International Christian Concern (ICC)-i metetdaksü.

Pakistan nung Population & Housing Census - 2017 ya kanga menor ang sangdongogo, aser iba report nung Pakistan nung Khristan nütsüng kanga ajema akümba indang shia lir.

1998 census nung Pakistan nung nütsüng million 132 nungi nütsüng shilem 1.59 bo Khristantem liasü, ajisüaka 2017 census report nungbo linük nung nütsüng million 207.68 nungi Khristan nütsüng shilem 1.27 dang kümogo.

Osangbener den jembidang tongti putir, Dr. Azad Marshall-i, "2017 census nung Khristan nütsüng ajema yangluogo ta ni bilemer. Iba data meshidakba kuli aika lir, item rongnung linük tesem ajaklen kanga tezülen aliba Khristan nütsüng züngdokba, ozü nütsüng (Khristantem) aika shisaliok maliba agi census forms junga fill up masüba, ozü nisungtem ket nung national identity cards

maliba aser tanur asodang register masüba densema lir," ta metetdaksü.

"Ajisüaka Khristan nütsüng kanga ajema yangluba nungji mimshia inyakba tebilemba onük kar alitsüa akok ta ni bilemer," ta Marshall-isa metetdaksü.

2017 census nung Khristan nütsüng ajema yanglubaji ajanga linük yimsüsüba menden nung Khristantem nem menden ajema lemsütsütsü aser sorkar welfare schemes aser mapa schemes nung Khristantem aika züngdoktsüa akok ta bilemer.

National Commission for Minorities züngsem, Albert David-i, 2017 census ashishia Khristantemi district 5 nung pei sasa nütsüng züngdangtsüla, ta ashi.

Osangbener den jembidang Albert-i, "Khristantemi district kar nung pei sasa census agiba sülen Khristan nütsüngji sorkari sangdongba report den kasa mesüra onoki census report anema court nung ken o agüja minorities census tanaben agitsü atema takhangba agütsütsü akok," ta metetdaksü.

OLONG PAITEP # 5840

| | | | | | | | | | | |
|----|--|---|----|----|--|----|---|----|--|---|
| 1 | | 2 | | 3 | | 4 | 5 | | | |
| | | | | | | | | | | |
| | | | | 6 | | | | | | 7 |
| | | 8 | | | | | | | | |
| 9 | | | | 10 | | 11 | | | | |
| | | | | | | | | | | |
| | | | 12 | | | | | 13 | | |
| | | | | | | 14 | | | | |
| | | | | | | | | | | |
| | | | | | | | | | | |
| 16 | | | | | | 17 | | | | |

| | | | |
|----------------------------|-------|--------------------------------|-------|
| TIPILEN | | LANGTSÜNGLEN | |
| 1. Nisung jenti | - (5) | 1. Tenük telong | - (9) |
| 4. Tsük rudenba | - (5) | 2. Committee dang ajar | - (5) |
| 6. Temzüng tesashi | - (5) | 3. Yagi ki okdoker | - (7) |
| 8. S _ _ _ i | - (3) | 5. Yim lenmang | - (5) |
| 9. Nisung telemsa | - (3) | 7. Temoatsü keter meyipa aruba | - (9) |
| 10. Anogoshi | - (4) | 11. Kanga junga menemba | - (7) |
| 12. Ajanga aor | - (4) | 12. Majinü | - (5) |
| 13. Tsük rizüngdak | - (3) | 13. Tzüma nung senzüba | - (5) |
| 14. Tebang nungi adokba | - (3) | | |
| 16. Süngdong tatembangtiba | - (5) | | |
| 17. Meputep | - (5) | | |

OLONG PAITEP # 5839 TELANGZÜBA

| | |
|---|--|
| TIPILEN : | LANGTSÜNGLEN : |
| 2. Bangsemo, 6. Tiptem, 8. Jen, | 1. Yipten, 3. Nüja, 4. Sangro, 5. Milen, |
| 9. Talila, 11. Aren, 12. Tzübo, 14. Alia, | 7. Tulu, 10. Laza, 11. Aben, 12. Tiyong, |
| 16. Angati, 17. Odi, 18. Azü, | 13. Ajizük, 14. Aitsü, 15. Tasa, 16. Aina, |
| 19. Sünglang. | |

ALOKBA O WARAKLA NA METSÜKTEPER :

Alokba : Na kanga kümdangangma, ni ashibabo kecha mangai nai molungba dang inyaktsüba.

Warakla : Nabo kechi? Ni ya kilir amaidang nai ayur ato! Nü den masü mojing ka denang kibong aküm nungang jungla süng.

Alokba : Adianu kibong kümra senchi chirang yimdak nungi aridoktsüji jungla ati.

Warakla : Oh Alokba!!

Lilir: WhatsApp

TANÜBO NAI LANGZÜANG

Q. SPAG9 ya India indang mezüng Indigenous ____ lir.

A. Tumour Antigen B. Tumour Antibody

C. RNA Antigen D. Tumour Antibody

_____ (Taruba adok nung onoki langzüsü)

YASHI ADOK TELANGZÜBA : 2010

AO OSHI ANGAZÜKDAK:

TANÜ ANGAZÜKTSÜBA OJANG

Juri
(n) kija meyong (personal)
* Iba kimong yabo küdier par **juri** kimong lir.

Jushi
(v) menüngdakba nung teka aser tebang aiba (interfere)
* Takobai tebang kanga **jushi** agi, pa tebilemba matalok.



NAI-A YA METETTER MA?

- INTERNATIONAL SABANG NUNG TANG FOOTBALL ASAYAR RONGNUNG GOAL TIMTIBA IDAKTSÜR ALIRTEM:**
1. Cristiano Ronaldo | Portugal | 103 goals / 174 caps
 2. Sunil Chhetri | India | 74 goals / 117 caps
 3. Ali Mabkhout | United Arab Emirates (UAE) | 73 goals / 89 caps
 4. Lionel Messi | Argentina | 72 goals / 143 caps
 5. Robert Lewandowski | Poland | 66 goals / 118 caps
 6. Neymar | Brazil | 65 goals / 104 caps
 7. Luis Suarez | Uruguay | 63 goals / 117 caps
 8. Zlatan Ibrahimovi? | Sweden | 62 goals / 118 caps
 9. Romelu Lukaku | Belgium | 60 goals / 93 caps
 10. Edin Džeko | Bosnia and Herzegovina | 59 goals / 114 caps

SUDOKU # 5882 TELANGZUBA # 5881

| | | | | | | | | | | | | | | | | | |
|---|---|---|---|---|---|---|---|---|---|---|---|---|---|---|---|---|---|
| | | | 8 | 1 | 7 | | | | 1 | 8 | 7 | 2 | 9 | 4 | 5 | 6 | 3 |
| | | 9 | 2 | | | 8 | 1 | 6 | 3 | 4 | 6 | 1 | 8 | 5 | 7 | 9 | 2 |
| 1 | 4 | | 3 | 6 | | | | 7 | 2 | 5 | 9 | 3 | 6 | 7 | 8 | 1 | 4 |
| 2 | 8 | | 4 | 1 | 6 | 3 | | | 6 | 2 | 1 | 7 | 5 | 3 | 9 | 4 | 8 |
| | 7 | 1 | | 2 | | 4 | | 5 | 4 | 7 | 3 | 9 | 1 | 8 | 6 | 2 | 5 |
| | 6 | | 5 | | | | 2 | 1 | 8 | 9 | 5 | 4 | 2 | 6 | 1 | 3 | 7 |
| | | | | 3 | 8 | 9 | 6 | 2 | 9 | 3 | 8 | 6 | 7 | 2 | 4 | 5 | 1 |
| | | 6 | | 7 | | 5 | | 3 | 5 | 1 | 4 | 8 | 3 | 9 | 2 | 7 | 6 |
| | | 3 | | 9 | | | | 8 | 7 | 6 | 2 | 5 | 4 | 1 | 3 | 8 | 9 |

OJANG LUTEP # 5426

- YZÜÜ :
- ZÜO :
- ÜRATZBA :
- ASHI :
- NÜANG :
- NGNUI :
- ÜNGTZLU :
- KAJAZÜ :
- ÜTZ :
- JEMAER :

OJANG LUTEP TELANGZÜBA # 5425

NIKONGTSÜTSÜ KECHI ANG AJURUTSÜAR MEMETET ANEPDANG TEPOR TAJUNG NGUA PELATEP

TAN HOPTA ATEMA - KOMA SÜLA ?

Q. Center government nungi Nagaland atema Covid-19 tongpang nung amshitsü yokba sen ajak yimsüsür aser tulersemi chia-adok nunga koma süla ?



Coimbatore (Tamil Nadu), June 10, 2021: Petrol aser diesel jenjang maneni atuba anema Brihostibarnü Coimbatore nung Social Democratic party (SDPI) züngsemtemi longkak aitba noksa nung angur.

Mumbai nung ki ka chirepba lendong nung nisung 11 asü

Mumbai, Aami/June 10 (Agencies): Bodhbar ayaterm nung Mumbai kübok Malwani kiyong nung khen amentepa asüba ki ka chirep ano ki ka anembangba lendong nung tanur 8 densema nisung 11 süogo, ta ketdangser kati metetdaksü. Bodhbar ayaterm 11:15 ako meta Malwani area kübok New Collector Compound nung ki ka chirepa ki ka anembangba sülen Fire brigade densema agency balala nungi züngsemtem arua kümzükba maparen tenzüka liasü, ta Brihanmumbai Municipal Corporation (BMC)

ketdangser kati chirep, ta ashi. IMD-i sangdong ka ajanga Maharashtra nung tzünglu kanga arutsü, ta tekümdangtsü metetdaksüba sülen NDRF team 15 yoka lir. Bodhbarnü Mumbai nung tzünglu kanga sashia aruba ajanga yimti lenmang nung tzü tali metsüing aser train-a mesenzüteti liasü. India Meteorological Department (IMD)-i Mumbai, Thane, Palghar aser Raigad district tem nung tzünglu kanga sashia arutsü, ta tekümdangtsü metetdakja lir.

Tang tashi nung asür asem maitsübo jangjaogo aser tanüingba nisung 8 maitsübo mejangja, ta BMC ketdangserisa metetdaksü. Kasa lendong nungsa nisung ti yiru aser parnok rongnung kabo kanga mejungi yirua lir; ki chirepba jana nungi kümzükertemji anasa aliba hospital balala nung yaridar. Maharashtra nung minister, Aslam Shaikh-i iba tesem semdangba sülen pai, tzünglu maneni aruba agi iba building

India nung Covid agi ano nisung 6,148 süogo

New Delhi, June 10 (Agencies): Tesüiba ghonda 24 tsüngda India linük nung coronavirus tashidak agi ano nisung 6,148 asü aser nisung 94,052 dak coronavirus putetogo, ta Brihostibarnep Union Health Ministry-i metetdaksü. India nung anogo ka kija nung coronavirus tashidak agi nisung timtiba asübaji ibai asütsü, ajisiüaka iba ya tamalen Bihar nung coronavirus agi nisung 3,951 asüba züngsemba agi lir, ta osang ka ajanga metetdaksü. Tamalen Bihar nung nisung 3,951 asübaji mezüngokra tesüiba ghonda 24 tsüngda linük nung coronavirus agi nisung 2,197 dang asü.

Bodhbarnü Bihar-i coronavirus agi asürtem tanaben asadanga mapang nung state health department-i, state nung iba tashidak agi nisung ajak agi 9,429 süogo, ta metetdaksü. Bihar nung coronavirus agi asürtem tanaben asadanga sülenbo linük nung iba tashidak agi nisung timba asüba state tem/union territories rongnung Bihar jenjang 17 buba nung aliba nungi jenjang 12buba kümogo. Tang tashi nung India nung nisung ajak agi 2,91,83,121 dak coronavirus putetogo aser iba tashidak agi asürtem ajak senteper 3,59,676 jungogo. May 14 nungi tenzüka tang tashi nung India nung coronavirus tashidak agi nisung

lakh 1 dak tema süogo. Tang India nung coronavirus agi teshirangdakpur 11,67,952 lir aser tesüiba ghonda 24 tsüngda iba tashidak agi shiranger 1,51,367 anepogo. Union Health Ministry-i ashiba agi, tang tashi nung nisung 24,27,26,693 nem coronavirus vaccine agütsüogo aser iba nungji tesüiba ghonda 24 tsüngda nisung 33,79,261 nem vaccine agütsüba densema lir. Brihostibarnep Indian Council of Medical Research (ICMR)-i, June 09, 2021 tashi nung samples ajak agi 37,21,98,253 tendangogo aser iba nungji Bodhbarnü samples 20,04,690 tendangba densema lir, ta metetdaksü.

External Affairs Minister S Jaishankar-i Kuwait semdang

New Delhi/Kuwait, June 10 (Agencies): India External affairs minister, S Jaishankar-i anogo asemnü Kuwait semdanga Brihostibarnü Kuwait tonga ogo. Osang angazükba agi, totzü jenti adokba takar linük den India tesendaktep tajungba akümtsü nükjidong nung Jaishankar-i Kuwait semdang. India aser Kuwait nati energy, shishilembaba, investment aser information technology tsütsü tesendaktep tajungba akümtsü atema joint ministerial commission ka tentettsü telemtetba agiba sülen ita asem shi lir tang India ketdangseri Kuwait semdang. Taküm March ita nung Kuwaiti Foreign Minister, Sheikh Ahmed Nasser Al-Mohammad Al-Sabah-i India semdangba mapang nung linük anapronglai joint ministerial commission ka tentettsü bangjema liasü. Brihostibarnü Kuwait nung aliba Indian Embassy-i twitter ajanga, "External Affairs

Minister of India, Dr S Jaishankar Kuwait tonga aruba mapang nung Ambassador-i pa agizüka liasü," ta metetdaksü. Tang India nung coronavirus wara anema raraba mapang nung Kuwait-ia India nem medical oxygen den teyari balala agütsüogo. Kuwait semdangba sülen S Jaishankar-i maneni June 12-14 anogotem nung East Africa nung aliba Kenya linük-a semdangtsü. Kenya nung Jaishankar aser Kenya Foreign Minister na leniba nung India-Kenya Joint Commission senden amentsü aser iba senden nungji linük ana tesendaktep dak sendakba onük aika nung o lemteptsü. Jaishankar-isa Kenya nung minister aika ajurua senden amentsü. Taküm küm tatembanglen 4buba India-Africa Forum Summit amentsü lia tang Jaishankar-i Africa nung aliba linük semdang. Tesüsabuba Summit 2015 küm ayongzüka amenba mapang nung Africa nung lenir 41 dena liasü.



1998 küm taoba mapang Ato kilonser, asür AB Vajpayee-i boxer Dingko Singh nem tetushi agütsüdang tangokba tejen noksa ka yangi angur. 1998 Asian Games nung India nung boxer Dingko Singh-i gold medal ngua liasü. Pa mapang talangka temesen cancer agi shiranga aruba sülen Brihostibarnü (June 10, 2021) alima nungi pilaogo. Pa arrshi küm 42 liasü.

UP nung BJP pur mangatettep adoka lia Yogi-i PM Modi ajurutsü

New Delhi, June 10 (Agencies): Tang Uttar Pradesh nung BJP pur telung nung mangatettep adoka lia UP chief minister, Yogi Adityanath-i anogo ananü Delhi semdang; iba mapang nung pai Ato kilonser, Narendra Modi, Union home minister, Amit Shah aser party bangdak lenirtem ajurutsü, ta osang ka ajanga metetdaksü. Yogi-i Brihostibar nikongdang Shah ajurua minute 90 shi senden amen aser Hokolbar anepdang pai Ato kilonser, Modi aser BJP Tir, JP Nada nata ajurutsü. Tang Uttar Pradesh sorkari coronavirus anema junga meinyaker ta osang aika angazüka Centre nung BJP lenirtem tebilemtsü akaba mapang Chief Minister-i Delhi semdang. Uttar Pradesh nung assembly election agitsü mapang ana nung lia state nung BJP MP tem aser MLA tem aikati yimjak nung Yogi-i aniba sorkari coronavirus anema junga meinyaktetba

atema aitsüogo. Uttar Pradesh nung coronavirus tanaben prokba mapang BJP sorkar junga merenemi liasü aser state nung Ganga ayong nung tasü mang noklang aika apongdeka anguba osang alima tesem ajungalen prokshiba agi BJP sorkar kanga tenüing menükogo. Bodhbarnü Congress lenir, Jitin Prasada-i Congress toktsür BJP nung adenba sülen anogo ka lir Yogi-i Delhi semdang. Tang Yogi-i Delhi semdangba mapang nung taruba küm tetenzüklen Uttar Pradesh nung assembly election atema-a jembitsüa akok. Tan ita tetenzüklen BJP general secretary, BL Santhosh-i Uttar Pradesh semdanga sangküm assembly elections atema party terenemshiba jenjang asadanga liasü. Tesüiba hopta ishika UP nung BJP pur telung nung mangatettep adokba osang agi Centre atongba sülen Yogi-i Delhi semdang.



June 10, 2021 nü Amritsar nung aluyimertemi mou atemba noksa nung angur. Tang coronavirus wara aliba ajanga alu nung aayanger nübo ajemba agi Punjab sorkari jelia alu nung mou atemtsü telemtetba agi.

South Korea nung ki ka lao, nisung 9 asü

Seoul, Aami/June 10 (Agencies): South Korea nung storey pongu atongtepa aliba ki ka raksaba mapang ajungbena bus ka madak laoa nisung tuko asü aser nisung ti kangasa mejungi yiru, ta yangji aliba fire station ketdangsürtemi ashi.

Linük yimtiba, Seoul nungi southwest tsütsü kilometer 270 shi pilar Gwangju jila nung Bodhbarn nikongdang ki raksaba tesem anasa ali nung bus anenba mapang iba lendong ya atalok, ta Gwangju Fire and Safety Headquarters nungi ketdangsürtemi ashi.

Television footage nunga nisung 17 mena aliba bus ya aoyi adoka jana agi nembangba sayuogo.

Iba ki laoba anasa dokan lapoka alisang Yang Ik-je ajanga ashiba agi, ali anokshia ola tulu adokba sülen pa kima

leni asemzuka ao. "Ni lenmang junga mangu, kechiaser tzüsü ama aoyi temelem agi longbanga liasü. Ni CCTV reprang dang ki chirepa bus nembangba angu," ta pai osangbener dang shia liasü.

Iba ki chirepba kuli ano mejangjateti lir, aser police temi iba lendong bushisüngdangba mapang lir, ta ketdangsürtemi ashi.

Iba ki raksaba tesem nung mapa inyaker ajak ki melao tsüngda aniener liasü.

Lendong aika ajuruba sülen South Korea nung ki-o-jen tajungba kumdaktsütsü asoshi mera balala agiba mapang lir.

1995 küm department store ka chirepa nisung 500 dak tema asü, koba yimjung nung lia linük nung lendong tulutiba liasü. Aji masüadang apu ka chirepa nisung 49 asü.

Israel sepaitemi Palestine mitkar asem tepset

Jenin, Aami/June 10 (Agencies): Occupied West Bank nung aliba Jenin yimti nung Israel sepaitemi anepdang züngia lia Palestinian Authority (PA) military intelligence officers ana densema Palestine nungi asem tepset, ta Palestine k e t d a n g s ü r t e m i Brehostibarnü ashi.

Officer ana ya arishi küm 23 tain Adham Yasser Alawi aser arishi küm 32 tain Tayseer Issa ta Palestine health ministry ajanga jangjatsüogo aser asür rongnung nisung tasembuba ya Israel nung tepuokdak yua alisang Jamil al-Amuri ta jangjaogo, ta Palestinian Wafa news agency ajanga ashi.

Israel nungeri iba 'undercover mission' inyakba mapang Palestine arishi küm 23 tain officer Muhammad al-Bazour kanga sashia yirua Israel mozüki kati bener ao, ta Wafa ajanga ashi.

The Associated Press ajanga online video ka ngutetba nung Palestine nunger officer tem ya gari ka tesülen atsüka liasü aser prangbong ola angashi. Nisung kati parnok ya Israeli "undercover" forces den khateper, ta ayimoktsü.

Israel nunger osang ajanga al-Amuri ya taoba mapang tepuokdak yua liasü aser Palestinian Islamic Jihad nung züngsem, ta ashir, saka Palestine ketdangsürtem nungi osang sangdonga mali.

Kasa mapang Palestine nunger Wissam Abu Zaid pua bener ao, ta osangtem ajanga ashir.

Alawi den asüpila sentong

nung shilem agitsü atema mangyimer meyirijang dak tema Jenin yimti nung adenshia liasü, aser ano nisung ana tepetseba mang aremsü atema anepalur.

Palestine nunger aliba jila ajak nung longkak aittsü osang ka sangdonga lir.

1990s mapang khen atema yimjung tezüngzüktep ya yangluba kübok prokshia aliba tesem kar nung PA nem tashi agüja lir, aser ajiaki occupied West Bank ya shilem 40 shi jungdaktsür. West Bank nung Israel security tashi amshir aser parnoki PA ajanga ketdangsüba Palestine nunger yimti aser jila nung mapang shia mita oa nisung apur.

1993 Oslo agreement kübok PA ajanga Israel occupation anema nokdaker indang osang Israel nem agütsüsüla, aser iba yimya dang "security coordination" ta ajar, saka taoba küm Israeli occupied West Bank amaktsü sentong yangluba mechi khen atema anena liasü.

Gaza Strip nung Hamas-i yimsü asür, aser "security coordination" atema PA aitsür. PA ajanga Israel ketdangsürtem den sendaktepba mechi Hamas züngsem aika puogo.

Israel-i Gaza den anogo 11 rarar yimjung tezüngzüktep ka yanglur hopta ishika lir iba timtem ya ajurur. Iba rara nung tanur 66 densema Palestine nunger nisung 250 dak tema tepset aser Palestine nunger telungpur temi Israel nung rocket khaloktsüba mapang nisung 12 tepseta liasü.

Taoba Mongolia ato kilonseri tir election akok



Ulaanbaatar, Aami/June 10 (TYO): Taoba mapang Mongolia ato kilonser inyaka alisang Ukhnaa Khurelsukh ya linük nung democratic yimya nung shimtetba tir trokbuba Bodhbarnü kumogo, aser tang yimsü tesüdak Mongolian People's Party (MPP) indang tashi tali tuluba akumer.

Küm tetenzüklen nüburtemi longkak aitba mechi ato kilonser menden nungi alusang Khurelsukh-i election agiba mapang opposition Democratic Party nungi Sodnomzundui Erdene aser Right Person Electorate Coalition nungi Dangaasuren Enkhbat na madak ayong ayonga takok angu, ta General Election Committee ajanga ashi.

Vote shilem 99.7 tashi azüngba mapang Khurelsukh-i vote tejang 821,136 mesüra shilem 68 nguteter liasü. Enkhbat tanabuba jenjang nung vote jang 242,805 mesüra shilem 20.1 aser Erdene ya tasembuba jenjang nung vote 72,569 mesüra shilem 6 ngur liasü.

Myanmar nung Aung San Suu Kyi anema ken o tasen benoker

Naypyitaw, Aami/June 10 (Agencies): February ita mitkartemi sorkar matsüngdok tashi Myanmar ania alila Aung San Suu Kyi anema ochimashi ken o talila benoker, shiba anogo ishika tsüngta okadak nokdaktsü lir.

Sorkar meyong Global New Light Of Myanmar ajanga ashiba agi, ken o tasen ya Anti-Corruption Commission ajanga Daw Khin Kyi Foundation bushisüngdangba nungi adokba lir.

"Lai la jenjang amshia ochimashi mapa inyakba ngutet. Anungji la anema Anti-Corruption Law section 55 kübok ken o benok," ta osangkaket ajanga ashi.

Arishi küm 75 tain Aung San Suu Kyi-i Yangon region indang taoba chief minister nungi sen \$600,000 den hon agizük, iba foundation atema ali aser ki-o-jen amshidaktsüba nunga tim masüba inyak, ta commission ajanga tai tonglokja lir. Daw Khin Kyi Foundation nung la ya mendenpula lir. Iba ken o nung la aitsüra küm 15 tashi tepuokdak ayutsü.

Ali amshitsü temelaba agütsüba nung ano ketdangsür aikati ochimashi mapa inyakba nung tai tonglokja lir, ta osangkaket ajanga ashi.

"Ken o ya pei aliba jila indang police station nung yashi (Bodhbarnü) lapoka liasü," ta

Mongolia indang constitution nung mangatetep adoka tir ka office nung kümsük ka dang inyaktsü melenshiba sülen Khurelsukh-i tang teinyakdak Khaltmaa Battulga melentsü.

COVID-19 tashidak wara mechi tenokdangba balala agüja aliba ajanga nübuyim sentong tulu mayongzüktepi liasü. National Labor Party nungi candidate Enkhbat dak

Vote shilem 99.7 tashi azüngba mapang Khurelsukh-i vote tejang 821,136 mesüra shilem 68 nguteter liasü. Enkhbat tanabuba jenjang nung vote jang 242,805 mesüra shilem 20.1 aser Erdene ya tasembuba jenjang nung vote 72,569 mesüra shilem 6 ngur liasü.

Myanmar nung Aung San Suu Kyi anema ken o tasen benoker



Democracy tsütsüi meilongi aoba mapang February 1 nü army tekolakba, Min Aung Hlaing-i mitkar tashi amshia sorkar atsüngdokba sülen Aung San Suu Kyi aser lar sorkar nung lenirtem pua liasü.

Mitkar lenirtemi tashi rakzükba anema nüburtemi ita aika longkak aita mass civil disobedience movement tenzük, saka yangji mitkartemi tashiyim amshia arur. Mitkar anema ola adokba aser longkak aita mapang nisung 850 dak tema tepsetogo, ta Assistance Association for Political Prisoners ajanga ashir, shirnoki iba tensa asadanga arua liasü. Aung San Suu Kyi anema

coronavirus putetba sülen kima yimtung nung agiba sentongtem timba Honibarnü thitsü.

Mongolia indang yimten yimsüsüba yimya balaka asünung parliament züngsemtemi sorkar shimteta sentongtem yanglutsü tashi agütsür, saka tir nem legislation magizüktsü, obendanger shimtsü aser anentsü tashi agütsür.

Aiben tir ya opposition party ajanga aziöker asünung, tashi lemdangba ajanga yimtenren tsütsü tatsütep kati arudaktsür, aser ibaji ajanga Mongolia mainer, ta aikati amanger.

Khurelsukh shimtetba ajanga MPP nem tashi tali agütsütsü imlar, saka pa tir menden nung amenba sülen tekeratiba nung party den tesendaktep ajak salatsüla.

Democratic Party ajanga "Mongolia without Dictatorship" yimyim kübok nübu yima liasü aser linük ya party ka aliba state akumer, ta Erdene-i tekumdangtsü ashi.

MPP tashi ulushiba ajanga Mongolia nung bendangeri sen indokba project tulutiba, Oyu Tolgoi copper mine koba leni anitsürar mejangjateter, koba Rio Tinto ajanga amshir. Kisü-jensüba jenjang tali akumba ajanga Ulaanbaatar nung aliba sorkari iba company den jembishitsü meranga arur.

ken o aika benoka lir, aser item rongnung bendang lima nungi walkie-talkie bener arua amshiba, coronavirus dak sendakba tenokdangba nung aibelenba aser akhi mapang amshiba Official Secrets Act nung aibelenba dena lir. Official Secrets Act ken o nung aitsüra, la küm 14 tepuokdak alitsü.

Myanmar nung Aung San Suu Kyi anema ken o tasen benoker

La ya Hombarnü okadak nokdaktsü lir.

Taoba küm November ita election agiba nung Aung San Suu Kyi'er teloki kanga junga takok ngua liasü, saka iba election nung ashi-külak mapa inyak, ta mitkartemi aitsü aser February 1 nü sorkar atsüngdoka liasü.

Directorate of School Education ajanga metetdaksür

Dimapur, Aami/June 10, 2021 (TYO): Lockdown mapang class I nungi IV, XI aser XII atema teküboklen agüja aliba subject tem nung Tele/Radio Tutoring agütsütsü asoshi, küm pungo tashi tesayuba maparen nung inyakadanga (teaching experience) arur aser item subject nung rajema alir Sorkar aser Nija school tem nungi tejangraba alir tesayurtem jaoker, ta Directorate of School Education (DoSE) sangdong ka ajanga metetdaksü.

* Classes I to IV : English, Hindi, Nagaland Heritage Studies, Mathematics, Science and S/Sc.

* Classes XI & XII :

Physics, Chemistry, Mathematics, Botany, Zoology, Business Studies, Entrepreneurship, Accountancy, Financial Market Management and Fundamentals of Business Mathematics.

* Class duration: minute 20
* Remuneration: Rs.1000/- per class.

Kohima dak alaka, tanga District nungi tesayurtemi iba

*** Tele/Radio Tutoring atema, tejangraba alir tesayurtemi teküboklen agüja alibatem abensatsütsüla:**

1. Name of Teacher :
2. Name of School Presently Serving :
3. Educational Qualifications :
4. Teaching Experience :
5. Class & Sub. interested for tutoring :
6. Email :
7. WhatsApp No. :

atema tenüng agütsütsü akok. Ajisüaka, senzüsebongtsü aser anenzüksü atema pei sasa anepalutsü nüngdaker, ta kasa sangdong nung shia lir.

Anüngji, jangra alir tesayurtemi teküboklen agüja alibatem MS Word Attachment nung 14/06/2021 anogo 1:00 pm matongdang email ajanga director.se.nagaland@gmail.com nung yoktsü akok.

Mon nung ozüng alema yi shibelener ka apu

Kohima, Aami/June 10, 2021 (TYO): Mon Police-i Bodhbarnü nisung kati Bolero pick-up ka nung Assam nungi Mon-i yi case 60 shibelener oya lia puogo. Aija alisang ya Assam nung alir, ta police-i ashi.

Nagaland Police sangdong ka ajanga, osang tejangja

angazükba sülen Mon police-i, June 9 nü Bolero pick-up ka nung IMFL (MC Rum) case 60 bener lia nisung ka apu, ta metetdaksü. Police-isa ibagari ya sota yuogo.

Aija alisang ya Sukani Gaon PS Rajgarh District-Assam nung alir Dambar B Chatri'er jabaso Kumar

Chatri ta jangjaogo. Pa Assam kübok Sonari nungi Mon jilai oya lia apu, ta police-isa metetdaksü.

Iba dak sendakba nung NLTP Act section 44(e) dak ajemdaker Mon PS nung ken o ka benokogo aser ken o maneni bushitsüngdangdar, ta police-isa metetdaksü.

South Africa nung Mahatma Gandhi'er semchir ka tepuokdak ayur

Johannesburg, Aami/June 10 (Agencies): Mahatma Gandhi'er tanabuba semchir arishi küm 56 tain tetsür ka South Africa nung sen million trok jenjang ashikülak mapa inyakba ken o nung aija Durban court ka ajanga küm tenet tepuokdak ayutsü obendang agütsüogo.

Hombarnü iba court ya ajanga Ashish Lata Ramgobin-i aibelenba nguteta liasü.

India nungi maliba oset ka atema import aser customs duty ajangtsü asoshi lai shishilempar SR Maharaj dang sen million R6.2 meshia külakoktsü, ta tai tonglokja liasü. Lai pa dang iba oset nungi tajangzük anguba lemsateptsü nangzükka liasü.

Nisung temeden balala asoshi nokdaker tejangja nübu, Ela Gandhi aser Asür Mewa Ramgobin na jala Lata Ramgobin yagi Durban Specialised Commercial Crime Court nung aija obendang agütsüba iba obendang jembishitsü asoshia masüngdang.

Sen indoktsüpur mesüzüksü mechi India nungi sü (linen) container asem tashi rong nung bener yokogo, ta lai kuli tiazi bendena sayu, ta 2015 küm Lata Ramgobin anema ken o jembitenzükba mapang, National Prosecuting Authority (NPA) indang Brigadier Hangwani Mulaudzi-i shia liasü.

Iba mapang Lata Ramgobin ya sen rand 50,000 agütsür bail



nung chioka liasü.

Hombarnü okadak ken o jembiba mapang, Lata Ramgobin-i New Africa Alliance Footwear Distributors indang director Maharaj ya 2015 küm August ita ajurua liasü, ta ashi. Iba company yagi aben süoshi, linen aser tsüngsem amala bendang lima nungi bener arur aser yanglur.

Maharaj indang company yagi tajangzük lemsatsü atema danga company tem nem senotsü agütsür.

South African Hospital Group NetCare atema linen ya container asem bener arudaksür, ta Lata Ramgobin-i Maharaj dang shia liasü.

Rong anendak oset atema lenmang lapoktsü asoshi senotsü nüngdaker ta Lata Ramgobin-i ashi aser amangdaksütsü atema lai Maharaj dang oset aliba indang document kar sayu. Ajidang masü lai NetCare nungi oset aliba indang invoice aser oset tongtsütsü zülubanglu kar sayu liasü. NetCare indang bank account nungi item oset

alitsü asoshi sen agütsüogo ta kuli maneni Maharaj dang lai sayua liasü.

Ramgobin'er kizü ya tejangja asünung aser NetCare document tem aliba ajanga Maharaj-i la nem sen aputsütsü atema zülutepa liasü.

Document ya taila aser NetCare ajanga Lata Ramgobin den tesentaktep kecha mali ta ngutetba sülen Maharaj-i ken o benoka liasü.

Mahatma Gandhi dak nungi jakzükera aika human rights activist lir, aser item rongnung Kirti Menon, asür Satish Dhupelia, aser Uma Dhupelia-Mesthrie nungertem lir.

Ramgobin tetsü Ela Gandhi ya alima ajungai meteta lir, aser la ya India aser South Africa nung kanga tushia amshir.

Pelaba Lemsateper



ASO :
05.10.1938

ASÜ :
07.06.2021

Asür I. L. Yanger (Salulamang)

Tsürabur Shiranga aliba mapang nungi akümüli tempangba anogo tashi kija, kibong aser lokti -i nupo, rongsen aser sarasadem ajanga ozü den yaritepogo nenok ajak tang kanga pelar. Tsügremiteni nenok ajak tali moajangma. Nenok temeim mapa tajung onok molungzüng nung alitsü.

**Chirnurtem & kinungertem
Chumukedima, Ward- 9**

Pelaba Lemsateper

"Kibubai ya ashir, tanaben shia aruba aser taküm Ni;
shibai Kü dak amangdir, pa süaka taküm alitsü." Yohan 11:25



ASO :
8/7/1940

ASÜ :
29/05/2021

Obala, T. Shilu Longkumer (Waromung) mapang talangka shiranga aliba mapang nungi tenzuka pa akümüli tembangba anogo tashi nung shirnokisa sarasadem, nübo aser rongsen agi yaria aruogo, nenok ajak dang kinüngertem pelaba lemsateper.

Onoki nisung ajak tenüng tetshia pelaba melemsatepteter, ajisüaka ajak takoksang Tsüngremi nenok ajak moajang ta ozü sarasadem.

Talisa item telok dang alakteta pelar:

- ❖ Dimapur Ao Baptist Arogo
- ❖ Ao Senso Telongjem Dimapur
- ❖ Waromung Senso Telongjem Dimapur
- ❖ Medemer & Kiyongertem

- Temeim kinüngtsü, jabaso aser kinüngertem.

Pelaba Lemsateper



ASO :
17/12/1937

ASÜ :
30/05/2021

T. SUPONG LONGKUMER

"Tsüngrem meimertem shirnok Pai melungba ama jaa lir,
pamok tsüngdang mapa ajak külemi tajung asoshi inyaker
ta asenoki metet." Rom 8:28

Onoki teti meima aliba Obala, T. Supong Longkumer (Waromung) shiranga mapang nungi tenzuka tasünü tashi nung kija-kibong, medemertem, kinüngertem, Arogotem aser lokti tentet balalai nübo, rongsen aser sarasadem ajanga nungita yariba atema kinüngertem ajak dang pelaba lemsateper.

- Temeim chirnurtem, semchirtem aser anükapang.



Dimapur, Aami/June 10, 2021 : COVID-19 Vaccination dak sendakba nung olulu osangtem prokba aser nüburtemi iba vaccine agütsü arendaka bilemba tensa ka nung, Thokihimi village GB, Mr Kakheto-i anir Thokihimi Village, Aghunato block, Zunheboto indang GB temi Aghunato CHC staff tem den longjemmer Brehostibarnü (10.06.2021) Thokihimi village nung Mass Vaccination Camp ka ayonga agiogo. Iba Camp sentong nung arishi küm 97 tain tantsür ka densema tajangzük angutsüpur nisung 93 nem vaccine agütsüogo. Chiyonga-jemba aser totzü inokba putu mendeni agütsü.

French Open: Joe aser Desirae nati temeyoktep tarep title kokogo



Paris, Aami/June 10, 2021: Roland Garros stadium kübok Brehostibarnü, French Open temeyoktep tarep final asaya nung America tsür Desirae Krawczyk aser Britain nunger Joe Salisbury nati Russia nungi temeyoktep tarep - Elena Vesnina aser Aslan Karatsev na tsükdaktsür sülen tenati takok marok amer tangokba noksa ka yangi angur.

Paris, Aami/June 10, 2021

(Agencies): Brehostibarnü, Roland Garros asayamung temeyoktep tarep final asaya nung Britain nunger Joe Salisbury aser America tsür Desirae Krawczyk nati takok nguogo.

French Open asayamung nung main draw title ka atema Britain küm 39 tashi ata arur sülen, taküm Joe-i Desirae den longjemer iba jenjang ajangzükto.

Philippe Chatrier court nung, iba temeyoktep tarep title takok angutsü asoshi, Desirae Krawczyk aser Joe Salisbury nati 2-6 6-4 (10-5)

agi Russia nunger temeyoktep tarep Elena Vesnina aser Aslan Karatsev tsükdaktsü.

Iba asaya mezüing set nung Russia nunger tarep yagi Salisbury aser Krawczyk na indang serve anaben tashi kokteta asaya aser tenati mezüing set takok angü. Set tanabuba nung, Krawczyk aser Salisbury nati breakpoint ka atema maangka ngua iba match tie-break tashi asaya.

Tie break tashi nung tenati kanga temulung agüja asaya aser kanga dang kara 4-0 agi Russia nunger tejakdang kümadok, koba asaya tatem tashi tenati amokbanger

asaya liasü.

1982 küm, main draw title pungo nungi ka takok angutsü atema, John Lloyd-i Australia tsür Wendy Turnbull den longjemer asayaba mapang, iba claycourt Grand Slam nung Britain indang temeyoktep tarep title tesüa kokdanga lir.

Temeyoktep tarep, koba Grand Slam pezü dak alaka tanga professional tour tem nungbo masayar, taoba küm alima ajunga asüingba coronavirus wara tenokdangba ajanga Roland Garros nung temeyoktep tarep shilem masayatet.

India team pur külemi training agi tenzükogo

Southampton, Aami/June 10, 2021 (Agencies): Brehostibarnü, Ageas Bowl anasa India cricket team pur mezüing 'group practice session' agitsü tenzükogo. New Zealand team den aruya aliba World Test Championship final asayatsü lia asayartem lemsar training agidaktsüba sülen anogo pungo lir tanü telok külemi training tenzükoger alitsü.

WTC final June 18 nungi June 22, 2021 tashi asayatsü renema lir. India team pur UK tongli anogo asem tashi shinga den majurutepe hard quarantine temli, gymnasium nung asemzüdakja aser mapang balala lemsar asayartem training agitsü melaba sülen, asayartem külem team pur den longjemer training agitsü temelaba agütsüogo.

"Onok külemi longjemer mezüing group training session agiogo aser iba maparen jangratemsüka liasü. #WTC21 Final atema #TeamIndia pur junga renemshidar," ta Twitter ajanga BCCI-i training session indang video tatsüka den külemi iba osang lemsatet.

Asayartem temulung süa net session nung shilem agiogo, kong skipper Virat Kohli, Rohit Sharma, Cheteshwar Pujara aser Rishabh Pant nungeri mapang agia batting süogo.

Kasa mapang, India bowler tem talisa Ishant Sharma, Mohammed Shami, Jasprit Bumrah, Mohammed Siraj aser Ravichandran Ashwin nungeri mapang peria agia practice session nung denogo.

Iba net training session temer sülen, fielding coach R Sridhar tawabangba kübok team pur fielding session agia liasü, kong slip cordon' tsütsü ball puzüksü/ajepzüksü indang nung tali temulung agüja iba session agi.

Mezüing (Anogo asem hard quarantine temer sülen), Hilton Hotel (Hampshire Bowl meyong) kübok asayartem pei pei takdang nungi adoktsü melaa, iba sülen kija training agitsü tenzük.

Iba den külemi, temang anepalutsü atema pei pei takdang nung asayartem nem osettsüsettem agütsü.



Rome, Aami/June 10, 2021: European Championship metenzükdang, Brehostibarnü Vatican nung Pope Francis-i UEFA president Aleksander Ceferin aser tanga soccer ketdangsurtem den ajurutepa parnok moatsüba mapang tangokba noksa ka yangi angur. Euro 2020, koba coronavirus wara süshia maoba ajanga küm ka atsülangja liasü, iba asayamung ya Hokolbarnü Stadio Olimpico nung tenzüksü, kong Italy aser Turkey na mezüing asayatsü.

Asian Games nung gold medal takok angusang Dingko Singh süogo

New Delhi, Aami/June 10, 2021 (Agencies):

Asian Games asayamung nung India atema gold medal takok angusang aser taoba mapang boxer Dingko Singh, mapang talangka temesen cancer agi shiranga aruba sülen, Brehostibarnü pa iba akümüli nungi pilaogo.

Singh arishi küm 42 liasü aser 2017 küm nungi iba tashidak agi pa timtema aruogo. Pai kinungtsü Babai Ngangom, jabaso ka aser jala ka toktsür süogo.

Cancer tashidak den rara aruba mapang ka nung, taoba mapang bantamweight (54kg) boxer Singh temang nung jaundice aser taoba küm COVID-19 tashidak putet.

"Asenok rongnung asayar mongin ka süogo," ta Olympic nung shilem agitsü renemer alisang boxer, Vikas Krishan-i Indian boxing tsütsü jembiba mapang iba olen lemsatet.

1982 küm regional asayamung nung Kaur Singh-i temaba jenjang nung takok anguba sülen, Indian boxing atema küm 16 nung Bangkok

Asiad nung Dingko-i mezüing gold medal takok ngua liasü.

Singh asüba osang angashia, Sports Minister Kiren Rijiju den national federation ajanga mangyim tejashi lemsatepogo.

"Shri Dingko Singh asüba osang angashia temulung züreper. India nung boxing asayar tajungtiba rongnung pa liasü. 1998 Bangkok Asian Games nung Dinko-i gold medal takok anguba ajanga India nung Boxing wadang tsütsü asentenshi tulu adokdaksü," ta Rijiju-i ashi.

Manipur superstar, Dinko Singh, shibai arishi küm 10 asüdang mezüing national title (sub-junior) takok angu, Asian Games nung pai gold medal anguba ajanga Indian boxing rongnung mezüing star ka ama pa aden aser pa sempet ajanga kasa wadang nung boxer aser trokben world champion M C Mary Kom ajungshia liasü.

"Pa ya rockstar ka, asayar mongin aser nisung tesashi ka liasü. Manipur nung pa tsüingteptsü asoshi jangrabangra repringba yimdangi arur. Pai ni kanga ajungmeso. Pa ya kü

indang hero' ka liasü. Pa iba akümüli nungi pila aoba ya takoksa tuluka lir. Pa anojungi kanga kara süadok," ta Singh temang nung cancer tashidak putetba sülen pai iba wadang toktsüba indang yimdangi arua jembiba mapang, Mary Kom-i ashi.

Ring nung tasüita asayar ka, Dingko-i Bangkok kübok ayongba Asian Games nung gold medal angutsü atema, pai Olympic medal angur ana - Thailand nunger Sontaya Wongprates aser Uzbekistan nunger Timur Tulyakov tsükdaktsü, koba India nunger boxer kati iba ama mapang nung jenjang tajung ajangzükto.

"Ring nung pai asaya sempet tajung amshia shilem agiba den külemi pa yimya/jakla tajung ajanga aika atsüa aru. Pa dak iba amala sempet angudang pelar, saka pa temang nung tashidak tulu agi kongshiba ajanga asaya nung junga shilem magiteti anojungi iba akümüli nungi pila aoba ya tejashitsüka lir," ta 1998 Asiad nung achaayanger ka ama inyaksang

asayartem taoba mapang national coach Gurbax Singh Sandhu-i ashi.

"Singh-i pa taküm nung takok tajung anguba aser timtem ajangshia arubatem, tarutsü nung asayartem atema tangazükba/tatishitsü ka südakjangma," ta boxing nung India atema mezüing Olympic medal angusang, Vijender Singh-i ashi.

1998 küm Dingko-i medal takok anguba den külemi, pa nem Arjuna award agütsü. Saisapong tsütsü shilem tajung agiba atema, 2013 küm Dingko nem Padma Shri award agütsü.

Dingko Singh-i Olympic nunga shilem agiogo. 2000 Sydney Games asayamung nung India tenüing nungi pai asaya liasü, saka pre-quarter tashi dang asayatet.

Indian Navy nung inyaksang, Dingko-i boxing asaya nungi anenba sülen, Imphal indang Sports Authority of India Centre nung coach ka

ama inyak, saka pa temang nung timtem adokba ajanga iba maparen toktsütsüsa kümadok aser mapang timbaka kidang dang munga liasü.

COVID-19 lockdown ajanga cancer atema radiation therapy agitsü timtem adokba sülen, taoba küm tayimtsü ajanga pa Delhi anir ao.

Delhi tonger sülen, Dingko dak jaundice tashidak putetba ajanga iba therapy magitet. Ambulance ka nung pa tanaben Imphal-i meyipa ao aser ki tonger sülen pa dak COVID-19 tashidak putet.

Iba wara (Covid-19) nungi taneptsü angutsü asoshi, pa mozüki nung ita ka shi amung.

"Kü dak timtem ajangshia aruogo aser iba ya tezüba masü, 'kechi komaka asüyongjia iba den raratsüla' ta tejembiba ka ait. Iba tashidak nem mekokdaksütsü temulungtetba tulu liasü," ta Covid-19 wara nungi taneptsü anguba sülen, Dingko-i ashi.

BILEMDANGANG

"Tajung tamajung angazükba ajanga taküm kaji ainer."